

Стихиры Преображения на «Господи, воззвах», глас 4:

Да будут уши Твои // внимлюще гласу моления моего.

Прежде Креста Твоего, Господи, / поим ученики на гору
высоку, / преобразился еси пред ними, / лучею силы
озаряя их, / отсюда убо человеколюбием, / отонуду властью, /
показати хотя воскресения светлость: / егоже и нас, Боже,
в мире сподоби, // яко Милостив и Человеколюбец.

**Аще беззакония назриши, Господи, Господи, кто постоит?
/ /Яко у Тебе очищение есть.**

Гора, яже иногда мрачна и дымна, / ныне же честна и свята
есть, / на нейже нозе Твои стоясте, Господи, / превечное бо
сокровенное таинство, / напоследок явлено сотвори: / страшное
Твое преобразование, / Петру, и Иоанну, и Иакову, / иже такова
сияния лица Твоего не терпяще, / и светлости риз Твоих, / ниц
на лице земли покрывахуся: / иже и ужасом одержими
дивляхуся, / видяще Моисея и Илию, глаголюща с Тобою, /
хотящая приключитися Тебе, / и глас от Отца
свидетельствоваше, глаголя: / Сей есть Сын Мой
возлюбленный, / о Немже благоизволих, / Того послушайте, //
Иже и дарует миру велию милость.

**Имене ради Твоего потерпех Тя, Господи, потерпе душа
моя в слово Твое, // упова душа моя на Господа.**

На горе висоце преобразься Спас, / верховныя имея
ученики, / преславно облистал есть, / показуя, яко высокою
добродетелей облиставше, / и Божественней славе сподобятся, /
глаголющая со Христом Моисей и Илия показоваху, / яко
живыми и мертвыми обладает, / и иже древле законом и
пророки глаголавый есть Бог, / Емуже и глас Отець из облака
светла послушествоваше глаголющий: / Того послушайте, Иже
Крестом ада пленивша, // и мертвым дарующа живот вечный.

Слава, и ныне, глас 6:

Прообразуя Воскресение Твое, Христе Боже, / тогда поят
три Твоя ученики, / Петра и Иакова и Иоанна, / на Фавор
возшел еси: / Тебе же, Спасе, преобразующуся, / Фаворская
гора светом покрывашеся, / ученицы Твои Слове, повергоша
себе долу на земли, / не терпяще зрети невидимаго зрака, /
ангели служаху страхом и трепетом, / небеса убояшася, земля
вострепета, // видяще на земли славы Господа.